

- प्रधानमंत्री नरेन्द्र मोदी कह्यो—**भारत सेमीकंडक्टर** हलका मांय एक अगाडी भागीदारी रा रूप मांय उभर रियो है।
- देशभर मांय जनगणना 2027 रो पैलो चरण काले ऊँ सरू व्हेला—घर घर जा र सूचीकरण अर स्वगणना री प्रक्रिया पूरी व्हेला।
- प्रदेश मांय आवता रोकड़ बरस मांय 262 ठौड़ां माथे 591 ईवी चार्जिंग टेशन थापित कर्या जावेला।
- राजस्थान माध्यमिक शिक्षा बोर्ड री 12वीं कक्षा रा कला, विज्ञान अर वाणिज्य वर्ग रा परीक्षा नतीजा ऐलाण।
- प्रदेश रा न्यारा—न्यारा हलकां मांय आतूणी विक्षोभ रा असर ऊँ बिरखा व्ही—कुछ ठौड़ां ओला पडण रा समचार।

000

प्रधानमंत्री नरेन्द्र मोदी आज गुजरात रा साणंद मांय **केन्स सेमीकंडक्टर** रा **ओएसएटी संयंत्र** रो उद्घाटन कर्यो। ई मौके प्रधानमंत्री कह्यो के ई संयंत्र मांय होवण वाळा उत्पादन सेमीकंडक्टर हलका मांय महताऊ कामयाबी है। वणा कह्यो के साणंद रा ई कारखाना मांय बण्या चिप्स अमरीका ताई पूगेला। वणा कह्यो के भारत **सेमीकंडक्टर** हलका मांय एग अगवा भागीदारी रा रूप मांय उभर रह्यो है।

श्री मोदी कह्यो के बन्दोवस्त कर्या जा रह्या है। जिण ऊँ भारत री सेमीकंडक्टर री जरूरत देश मांय पूरी व्हे सके है। ई कारखाना रा उद्घाटन ऊँ भारत रा सेमीकंडक्टर उद्योग ने नुवी गति मिलण रो जिको करता प्रधानमंत्री कह्यो केन्स रा उत्पादन रो एक मोटो हिस्सा पेला ई बुक व्हे चुक्यो है। ध्यानजोग है के ई संयंत्र रा सगळा चरण पूरा होवण माथे इण रो उत्पादन बूतो रोज 6 दशमलव 33 मिलियन यूनिट व्हेला। वटे ई श्री मोदी गांधीनगर रा कोबा मांय **सम्राट संप्रति संग्रहालय** रो उद्घाटन ई कर्यो। ओ संग्रहालय जैन इतिहास, सम्राट संप्रति रा जीवन, वां रा शासन अर अहिंसा रा संदेश ने समर्पित है। ई मौके प्रधानमंत्री कह्यो के ओ संग्रहालय देश री समृद्ध सांस्कृतिक अर आध्यात्मिक विरासत ने नुवी पहचाण देवण कानी एक महताऊ कदम है।

000

देशभर मांय जनगणना 2027 रो पैलो चरण काले ऊँ सरू व्हेला। ई चरण मांय पूछया जावण वाळा 33 सवालां ने सरकार अधिसूचित कर दिया है। भारत रा रजिस्ट्रार जनरल अर जनगणना आयुक्त मृत्युंजय कुमार नारायण बतायो के जनगणना दो चरणां मांय व्हेला। पैला चरण मांय घर—घर जा र सूचीकरण अर स्व—गणना री प्रक्रिया पूरी व्हेला। ओ चरण राज्यां अर केंद्र शासित प्रदेशां कानी ऊँ तैय कार्यक्रम मुजब 30 सितम्बर ताई चालेला। वणा बतायो के जाति आधारित गिणती जनगणना रा दूजा चरण मांय करी जायेला। श्री नारायण विदेश मांय रहवण वाळा भारत वासियां री ई जनगणना मांय भागीदारी करण रा तरीका ने ई साफ कर्या।

000

आवता नुवा रोकड़ बरस मांय प्रदेश रा 262 ठौड़ां 5941 ईवी चार्जिंग टेशन थापित कर्या जायेला। केन्द्र सरकार राजस्थान अक्षय ऊर्जा निगम ने राज्य मांय इलेक्ट्रीक व्हीकल चार्जिंग टेशन थापित करण सारू 81 करोड़ 12 लाख रिप्यां री रोकड़ मदद मंजूर करी है। इण ऊँ राज्य मांय ईवी चार्जिंग रा आधारभूत ढांचां ने मजबूती मिलेला। साथै ई ग्रीन एनर्जी ने बधावो मिलेला। ध्यानजोग है के राजस्थान अक्षय ऊर्जा निगम प्रधानमंत्री ई—ड्राइव योजना रे तैत प्रदेश मांय नुवां ईवी चार्जिंग टेशन थापित करण सारू भारत सरकार ने समक्ष प्रस्ताव दिया हा। योजना रे तैत जयपुर मांय 112, अजमेर

मांय 49, उदयपुर मांय 39 अर कोटा मांय 28 चार्जिंग टेशन लगाया जायेला। इण रे अलावा 34 चार्जिंग टेशन राष्ट्रीय अर राज्य राजमार्गा माथे लगाया जायेला। इण ऊँ लांबी दूरी री यात्रा करण वाळा ईवी उपयोगकर्तावां ने सुविधा मिलेला।

000

नुवा रोकड बरस मांय काले ऊँ प्रदेशभर मांय राजस्व अदालतां मांय विचारू मुकदमा ने बेगा अर बगतसर निपटावण माथे खास ध्यान दियो जायेला। ई बारा मांय सगळी तहसीलां, उपखंड, अर जिला अर संभाग थर माथे राजस्व अहलकारां ने खास जिम्मेदारी दीरीजी है। ई बारा मांय मुख्य सचिव वी. श्रीनिवास राजस्व अहलकारां सारू दिशा-निर्देश काड्या जिण रे मुजब रेवेन्यु अहलकारां ने हर कार्य दिवस ने 4 घंटा बरोबर अदालत चलावण रा निर्देश दीरीज्या है।

000

राजस्थान माध्यमिक शिक्षा बोर्ड-आरबीएसई री 12वीं कक्षा रा परीक्षा नतीजा आज ऐलाण कर दीरीज्या। कला वर्ग रा नतीजा 97 दशमलव पांच चार फीसदी रह्या, जद के विज्ञान वर्ग रो 97 दशमलव पांच दो अर वाणिज्य वर्ग रो 93 दशमलव छह चार फीसदी रियो। शिक्षा मंत्री मदन दिलावर ऊँ उदयपुर वीडियो कॉन्फ्रेंसिंग री मार्फत ऐ नतीजा ऐलाण कर्या। शिक्षा मंत्री पास होवण वाळा पढेसरां ने शुभकामनावां देवता वां रा सुनहरा भविष्य री कामना करी।

000

प्रदेश रा दौसा अर करौली जिलां मांय ई अबै काश्तकारां ने खेती काम सारू दिन मांय बिजळी सप्लाई तैय करी जायेला। आ दोन्यू जिलां मांय बरोबर बिजळी सप्लाई ऊँ जोडण ने पछे प्रदेश रा कुल 24 जिलां मांय दिन री बगत खेती काम सारू बिजळी सप्लाई मिलेला। मुख्यमंत्री भजनलाल शर्मा ई बारा मांय सोशल मीडिया पोस्ट मांय ओ ऐलाण करता कहयो की राज्य री सरकार सगळां जिलां मांय काश्तकारां ने दिन री बगत बिजळी देवण रो संकल्प लियो है। वणा कह्या के ई कडी मांय बदल्या बजट मांय ओ काम विगतवार साल 2027 ताई पूरो करण रा लगस तैय करी ज्या है। सरकार रा ई फैसलां ऊँ दौसा जिला मांय कोई 52 हजार ऊँ बत्ती अर करौली जिला मांय 35 हजार ऊँ बत्ती खेती उपभोक्तावां ने फायदो मिलेला। ध्यानजोग है के दोन्यू जिलां मांय पीएम कुसुम योजना रा कम्पोनेंट-ए अर सी मांय 32 मेगावॉट बूतां रा 17 सौर ऊर्जा संयंत्र थापित करी ज्या है।

000

केन्द्र सरकार राजस्थान समेत पांच राज्यां मांय पंचायती राज संस्थावां अर स्थानीय निकायां सारू रोकड बरस 2025-26 रे दौरान 15 वां वित्त आयोग ने और सब्सिडी दी है। आ सब्सिडी जमीनी थर माथे शासन ने मजबूत बणावेला अर पंचायती राज संस्थावां मांय जरूरत मुजब स्थानीय विकास ने मजबूत बणावेला।

000

सीकर जिला रा लक्ष्मणगढ़ तहसील रा गनेडी गांव मांय माटी ढह जावण ऊँ तीन टाबरां री मौत व्हे ग्यी। अ टावर गांव मांय माटी रा टीबा माथे खेलण सारू गुफा बणा रिया हा। इणी बगत मांटी ढहवण ऊँ ओ हादसो व्हीयो। पुलिस मौका ऊँ तीनू टाबरां ने अस्पताल मांय भर्ती कराया जठे वां ने मृत ऐलाण कर दीरीज्या।

000

प्रदेश रा न्यारा-न्यारा हलकां मांय आज ई भगवान महावीर री जयंती रे मौके कार्यक्रम व्हे रिया है। केई शहरां मांय संवारा प्रभात फेरी निकाळ ने महावीर स्वामी रा संदेश ने आत्मसात करी ज्या। सवाईमाधोपुर मांय जिला मुख्यालय माथे शोभा जात्रा निकाळी ज्यी अर सांस्कृतिक कार्यक्रम व्हा। पाली मांय निकाळी ज्यी शोभा जात्रा मांय भगवान महावीर ऊँ जुड़ी झांकियां मन मोह लियो। चित्तौडगढ, सिरोही, चूरु अर झुन्डुनू मांय ई भगवान महावीर रो जन्मकल्याणक महोत्सव सिरधा अर आस्था रे साथै मनायो जावे।

000

प्रदेश रा न्यारा-न्यारा हलकां मांय आज ई आतूणी विक्षोभ रो असर बण्योडो है। शेखावाटी हलका मांय लारला 24 घंटां मांय आंधी-बिरखा री गतिविधियां व्ही है। सरहदी अर उत्तराद जिलां मांय आज ई कठेई-कठेई हल्की बिरखा होवण ऊँ मौसम सुहावणो बण्योडो है। श्रीगंगानगर जिला मांय आज केई ठौड़ां बिरखा व्ही अर अनूपगढ़ हलका मांय ओळा पड्या। 20 एलएम लूनिया मांय आकाशीय बिजली पडण ऊँ चार लोग झुळस ग्या, जिण ने ईलाज सारू अस्पताल ले जायी ज्या है। हनुमानगढ़

जिला मांय केई ठौड़ां हलका ऊँ मझला दर्जा री बिरखा व्ही। मौसम महकमा मुजब काले उदयपुर अर कोटा संभाग मांय छुट-पुट ठौड़ां माथे हल्की बिरखा रा आसार है। खैरथल-तिजारा जिला मांय ई केई ठौड़ां बिरखा अर ओळा पड्या। डीग जिला मांय ई केई ठौड़ां तेजा हवा रे साथै बिरखा व्ही अर ओला पडण रा समचार है। मौसम केन्द्र जयपुर रा निदेशक डॉ. राधेश्याम शर्मा बतायो के आवता दो दिन पछे एक और आतूणी विक्षोभ रे सक्रिय होवण रा आसार हैं।

ई बीचे, मौसम महकमो काश्तकारां ने तैयार फसलां, कृषि मंडियां अर धान मंडियां मांय खुला मांय राख्या अनाज अर जिंसां ने ढकण अर हिफाजती ठौड़ां माथे राखण री सलाह दी है।

000

भारतीय रिज़र्व बैंक पूंजी बाजार मांय निवेश रा बारा मांय आप रा नुवां नियमां ने तीन मीना सारू टाळ दिया है। बदल्या बगत सीमा पैली अप्रैल री ठौड़ पैली जुलाई 2026 ने लागू व्हेला। आरबीआई कह्यो है के ओ फ़ैसलो बैंकां, पूंजी बाजार मध्यस्थां अर उद्योग निकायां री अरज रे पछे लीरीज्यो।

000